

# BIZNIS FORUM BRČKO DISTRIKT 2017

9.11.2017. Pod pokroviteljstvom Vlade Brčko distrikta BiH, a u organizaciji Udruženja računovođa, forenzičara i revizora Brčko distrikta BiH, danas je u Domu kulture u Brčkom počeo prvi Biznis forum Brčko distrikta BiH na temu „Novi razvojni ciklus“.



Prvi Biznis forum Brčko distrikta BiH svečano je otvoren pozdravnim riječima gradonačelnika Brčko distrikta BiH Siniše Milića, zamjenika gradonačelnika Ante Domića, glavnog koordinatora Vlade Brčko distrikta BiH i direktora Biznis foruma Damira Bulčevića, predsjednika Skupštine Brčko distrikta BiH Eseda Kadrića, supervizora za Brčko distrikt BiH Dennisa W. Hearnea kao i ambasadorice Republike Indonezije u BiH Amelije Yani.



U okviru plenarnih sekcija panelisti i učesnici imali su priliku polemisati na pet tema i to: Lokalni i regionalni razvoj, Obrazovanje i mladi, Privredni potencijali Brčko distrikta BiH, Poljoprivredni potencijal Brčko distrikta BiH kao i Saobraćaj i turizam.



Gradonačelnik Siniša Milić istakao je da je evidentno da smo došli u fazu stagnacije u ekonomskom smislu i kako je naveo u tom pogledu su korisne ideje i zaključci koje će se izroditi na Biznis forumu, od strane ekonomske struke, ali i cijele privredne zajednice. „Vlada Brčko distrikta BiH bi trebalo da slijedi zaključke ali i da osigura vladavinu prava i da se zalaže za političku stabilnost, kako bi onima koji privređuju osigurali siguran ambijent. Brčko od ostalih dijelova BiH izdvaja geografski položaj, prirodni resursi i činjenica da možemo donositi svoje propise“, istakao je gradonačelnik Milić.

Glavni koordinator Vlade i direktor Biznis foruma Brčko distrikta BiH Damir Bulčević naglasio je da Biznis forum ima za cilj da okupi privrednike iz zemlje i regije, predstavnike institucija, akademske zajednice, diplomatskog osoblja te investitora. „Na ovaj način smo ostvarili novi vid komunikacije s privrednom zajednicom. Čut ćemo mišljenja privredne zajednice o njihovim dobrim i lošim iskustvima i poboljšati saradnju s njima inkorporirajući njihove zahtjeve u programe koje realizujemo“, naveo je Bulčević.



Gosti Biznis foruma Brčko distrikta BiH su predstavnici desetak ambasada, predstavnici lokalnih zajednica iz BiH i okruženja, a među panelistima su se našli uspješni privrednici te predstavnici univerziteta iz Kine, Rusije i Srbije. Primarni cilj ovog događaja jeste da kroz dijalog, rasprave i razmjene mišljenja, tradicionalno postane prepoznatljivo mjesto, kao važan poslovni i investicioni događaj regije za širenje znanja i poslovnih ideja.